

四庫全書

集部

欽定四庫全書

皇甫少玄集卷十五

明 皇甫湜 撰

送別

送楊虞衡之任白下

風雲漢殿元相接
山澤周官尚可求
近侍獨憐為令子
名曹總喜得英流
行瞻北極南江夜
坐憶金陵玉苑秋
戀闕亦知心未已
送君今日羨仙舟

包子席上送張某歸華亭

冬筵就日情悲壯，谷口雲深有故廬。
試看飛蓬行欲遠，獨攜藏劍意何如。
千年碧海時歸鶴，十月黃河早負魚。
逆旅談君盡豪俊，誰堪別句醉中書。

冬日送羅半窓四川兵備

為邦實擬豫章材，五馬嘗聞四郡迴。

嘗歷守江右四郡

西顧羌

夷朝論重南趨旌，節歲華催經過楚澤。
玄雲變朝暮，變江錦水來他日。
遠誇槃木至漢庭，宜舉萬年杯。

再送粟子

役車聞唱歲華殘
客裏邊愁無奈
寒魏闕分明當落日
滹沱河上莫東看

賦得襄陽樂奉送北野韓先生

襄陽風日本來嘉
晴看雲錦被江沙
踈地先垂楚臺柳
明粧不斷習池花
習池路接城南陌
陌上聯翩侈遊客
且將絃管鬪繁華
未論冠蓋矜輝赫
從知朔別還晦期
何惜千金輕一擲
并州愛將懶迴鞭
高陽使君時岸幘

別有芳妍喚大隄煙花如簇望來迷並跨雕鞍騰綠水
俱搖翠幃渡清溪渡憶騰鞍紛絡繹采珠拾羽競招攜
氤氲香縠遙疑霧飈纚紅羅煥若霓擲簫彈箏歡未已
相逢盡是便娟子嘗聞艷舞冠西荆詎識神姿羞洛水
太平樂事休教晚江漢風流應不遠江上傳呼五馬來
橋邊正值行春返行瞻夏口夏雲滋回望春臺春恨彌
桑田滄海無窮慮萬代千齡同一時蘅皋木落離前淚
蕙渚鴻歸別後思賦成春日襄陽樂腸斷秋風峴首碑

送吳長洲改任陽穀

惟昔遊崇省多士揚清塵來俊飲遐軌茂允如蘭賓迨
茲覲明宰言歸自河津在疚方嬛嬛庶慰慈母仁君子
獨負俗吏道多緇磷瞻塗邁魯陽臨岐惻予神徙植念
懷霜皇澤回如春殷我寤寐情日佇嘉命新

家叔攜舟橫塘餞別晚登吳山

香剎隱巖曲烟蘿一徑懸那堪風景處共此別離筵度
嶺雲木異浮空島嶼連花濃三月酒春漫五湖天勝託

丘中好詩裁塘上篇終期謝塵紱歸賞竹林前

大雲菴席上別郡守作

使君送客祖筵頻風景登臨復此晨
蘿徑不知軒騎入蓮峯常對郡齋新
滄波裊裊空違思楊柳依依可奈春
明發天涯重回首習池留醉與何人

別竹堂寺僧

我別休公去悠哉江上心離蹤眷春水
征路渺雲岑月散寒猿影山空芳杜陰
仍憐晤言意贈處一何深

再別兄弟作

可歎江潭客重為魏闕遊
河梁一悵望芳草劇含愁
隴樹三年淚邊雲萬里秋
無由慰棲泊羈影任悠悠

留別徐紹卿

投跡日云昧自知丘壑賢
嗟予荐行役遇爾滯歸年
帆遠江津樹雲深谷口天
如何數行淚獨灑故人前

送陳斯羽

之子不得意淒涼薊北行
遙瞻鴻雁塞念爾蓼莪情
山

冷雲迎旆沙長雪暗城惟餘羊舌泣握手淚沾纓

飲城隅王氏北樓與周子別二首

麋鹿遊何處傷心蔓草多百花帆上錦無復照滄波

其二

花藏梅福市山繞闔閭城却望垂楊色憐君送別情

送顧懋涵北上

弱齡謬自許不知干謁非西望咸陽城青雲滿皇畿談
笑揖公卿結交盡英彥儕輩有辟疆流輝獨蔥蒨激昂

侍詔時金馬陪遊衍豈意三上書十年不被薦貢冠爾
未彈王綬予先結聊同燕石售以哀荆人拙君今到京
華高步光朝列千里不乏才崇臺非徒設振手胥郊道
臨流念將別何以喻繁憂楊花亂如雪善仕寡遇合蹭
蹬隨風塵問我傷禽者何如泣玉人明發馬蹄間待子
潞河津滿沽燕市酒醉憶金陵春及時恨不早所冀終
一伸側望金河曙商歌懷苦辛

苦別行送伯兄季弟北上

孤鳳辭金門落羽向江水西眺揚子津那堪別愁起我
觀伯季遑蹀躞十年蹭蹬胡為爾君不見馬生窮老志
邊野公孫徒步相天子時乎遇合豈云晚尚是吾家兩
千里憶昔分飛蘭省間彤庭無復相追攀丈夫西游不
稱意東歸復傳多苦顏人生榮悴會有時簡書且赴金
陵期含情不得向人語落魄終然為世嗤都城策馬去
駸駸揚帆念爾臨江潯長天却望鴈飛盡落日驟下江
流深嗟嗟四鳥今異林天涯明發誰為心欲知此別良

最苦看取燈前白髮侵

送白川少司寇入賀還南都

清霜錦樹抗行旌
沙塞繁雲渺去程
瞻戀瑣闥臣節苦
攜將金鏡主恩明
夜深霄色懸鵝觀
天外江流接鳳城
遙識芳菲舊遊地
重來殊覺壯平生

金陵送吳山人之京作

三月君為冶城客
芳草連天暎江碧
城東谷寺幾銜杯
揚子津頭更離席
長郊烟絮迷征輪
問君何復西游秦

滄波魏闕俱流落日暮風塵愁殺人

送陳水部道通

南天殘雪此逢君忽散征驂北路雲獨歎別時花滿眼
誰堪聲斷鴈歸羣江流繞郭春難盡堞影連山曙不分
幾度沾巾悲落羽白頭離思轉紛紛

奉送東橋顧公考績北上

正衡宣文紀泰道熙華辰變治資平格秉哲時經綸英
賢奠宗鎬居師聿登淳弼成乾化闡孚偃祥風臻澄臬

綏甸宇獻績朝淵宸霄徒戒藻舳星旆邁崇闈曜牡停
蘭觀祖帳喧玉津皇休緬荆服玄寢綜信臣仁圉被興
謠求瘼無輟輪褰帷江山壯憑几雲霞新協卜希元龜
應圖佇遊麟輔台迪往載沃朕徵伊人樞掖騰清響隄
阜悵徂春薄躬荷鴻育庶以忘沈淪

省中贈別詩三首

祇役辭蘭省驅車邁京陽大江浩無極遊子心慨慷疎
星斂華闕朝霞興崇岡平原一顧望山樹靄蒼蒼集送

臨城隅轅馬各傍徨道路豈云遠忽在天一方念與我
友別侘傺中自傷

其二

夙駕遵城阜炎飈散郊岐靈臺寂重岑列樹敷丹闌懷
闕多紆鬱離友增殷悲音徽日以闊眷戀心有違束髮
慕古人在遠志不移努力宣四方慰爾如渴飢

其三

踰紀塵朝闥遠跡徂舊京蘭林穆清軌江介滋烈情同

聲在休顧握手慰平生蔡美鬱璵璠施也必世英高義
激雲飈竒藻綯天庭晤言薄人爵比景遺華齡徒積浮
海心時網坐自嬰臨流念將別棄置終何成飲泣踰垆
畛回睇眷音形希君篤微鑒良圖但含貞

登弘濟寺閣別謝施侯蔡四省友

高閣橫江出凌空石道行朋遊謝城郭幽意靄山楹斷
壑晴雲滿長蕪夕鳥平迴波對延佇一遣別離情

送孫水部北上

共有鴻飛意看君鳳節還言尋畫省舊來訪華門問問
隱桃溪岸乘春雲際山河隄無限柳今日不堪攀

送周子籲再入蜀

題柱他年貴朝正使者旋滄江一會面白首轉堪憐鄉
淚猿仍下巴書鴈不傳沈冥別有問何事女牛邊

秋日映江樓別同省諸公之山陰

江樓雨初散送客下江潯夕引西興望蒼然溪路深連
巖起秋色夾岸映疎林坐聽寒砧發空驚于役心

送李廉憲之蜀

摩天燕雀本非儔，侯相終知屬虎頭。
祖帳忽看風景劇，分符曾羨壘書優。
愁深鳥道岷山合，春逐雲帆楚水流。
蕭傅此來緣歷試，花前那滯錦官遊。

送許夔州

君今策馬下瑤京，明發聞猿引蜀程。
白首風塵羈宦意，青春江漢旅遊情。
帆通錦水流難盡，齋近巫山雲易生。
高卧也知為郡樂，淮陽何必羨承明。

送南峯先生

獻歲文星動閭闔天書遙出鳳凰城翠華此日開東觀
綵筆何人冠兩京百里郵花催使節一江煙柳引春旌
君王更覓前朝彥為把凌雲待長卿

宴東湖流杯亭送歐陽大參赴蜀

流杯亭上酌脩竹亂溪沍暝樹煙常合春山雨不分別
情依去鳥客路入重雲懷舊仍傷遠勞歌夜獨聞

送孫取益戍金鄉三首

越客歸田日逢君戍越人沙頭潮正急送爾各沾巾

其二

爾掛秋茶法遙從越塞軍夢家江上月防堠海邊雲

其三

為語霜砧婦休為玉筍啼祥風昨夜至報道有金雞

送周山人之越山人急友難而行適予自越還

重有感焉

送君非遠適感慨一交情望裏江山別愁邊風露清因

之訪遺跡直是昧平生空復湖隄月悠悠向客明

子循再謫海沂將別書恨二首

悵望懷沙客征鞍何處歸寒生淮水暮雲繞魯關微直
道寧辭黜明時獨歎違誰堪流落羽江上更分飛

其二

昔去鵷鷺道同為竄逐臣今來鴻鴈影重對別離人海
國歲華晚江天涕淚頻驚蓬任飄泊雲雪度迷津

寒夜對月子循將別

今夜江城月清輝祇益悲可憐顚顚影況復別離時白
露故宮滿丹楓楚岸滋天邊有飛鵲何自繞南枝

答子循弟留別

憐君歲暮引離旌斜日霜空聽鴈聲湘水再投仍有賦
北山一去豈無情城分沂水愁雲繞江合維揚霽雪明
馬首知予更何向天涯遙憶淚沾纓

席上送子循弟四首

歲晚孤帆發遙遙涉海沂清樽此為別心事已都違永

夜江山望連空雲霰微楚歌君莫奏行子欲沾衣

其二

離樽日南至行役魯東門海徼雲千里寒城雪滿原聽
歌仍有淚執手已無言何異飄飄鴈年年別故園

其三

之子鳳五色如何鍛翮羣悲風動地起飄落海天雲我
亦儀庭侶因君別淚紛徘徊未肯下太息賈生文

其四

魯客臨當發西風楚鴈哀
經秋離思積頻夜別筵開
漢主凌雲意相如作賦才
登封儀已就望幸幾時來

楓橋舟中與子循別

落日下離津江天引望頻
黯然對尊酒惜爾向風塵
白海迷來鴈清霜畏旅人
從知比柯葉信是共沈淪
政理操刀暇交情贈縞新
班荆懷雨露投筆謝緇磷
阮籍窮途淚平原世網身
何能亦飄泊谷口正逢春

欲別子循登大石雲泉菴

惜別向何處山龕到竹林以予獨往意憐爾倦遊心石
壁飛殘葉蘿軒下夕陰清溪一回首惆悵白雲深

雨夜離思

清齋隱蘿月簷暝滋林巒澤國夜溪雨亭臯春草寒山
光帶滉漭池響交檀欒憶處畏入夢遙遙獨寤歎

皇甫少玄集卷十五

欽定四庫全書

皇甫少玄集卷十六

明 皇甫湜 撰

行役

長至謁皇陵初出城偕林子熙載

祇命戒晨發朝回車馬紛梧楸開宿霧鐃吹引征雲眺
賞芳辰逼風塵旅思分還憐雙白鶴天際自為羣

昌平道中

北山信雄峙玉寢渺玄霄昔聞漢室禮猶見翠華朝木
落平窺戍沙沈緩去輶茲行覽帝業一使壯心饒

宿昌平館

沙澗仍餘照驚飈促去鞍烟生遠天盡暝入孤城寒感
事塵蹤別悲年物役殘羈宵定取醉圓月度長巒

月下趨茂陵

沿趨碧澗隈沙白映寒梅月倚千巖靜雲分七殿開喜
觀文物盛尚想戰塵哀儼陟珠丘地齊瞻北斗迴

泰陵

我明七葉帝玄寢萬年安永夜流泉道長春宿殿欄
笳聲遙霧樹月影尚鴛鴦不盡蒼梧恨徒悲玉座寒

夜還昌平宿

返轡遵松路關山月正中泉聲深澗壑霧氣薄園宮
候館寒頻入湖天曉易通荒城起哀角客思浩無窮

近城作

野曠日初落馬煩風正侵鴈飛沙塞少星射汨流深暗

闕迷霄色鳴鐘下夕陰終傷萍梗泛益起故園心

赴淮二首

濟物隆所遇守道殉厥身將命事有恪總轡越城闔靡
靡即遙路懽惘辭密親振纓儷皇城夙夜豈異人臨塗
判餘袂涕下盈衣中渺默絕音形旋顧獨傷神乖離感
商氣夷悅曠徂春陰雲興崇爨長風激河津落日厲歸
鳥平野驚驚磨覽物起悲思征途逝駢駢寤寐瞻京闕
慷慨終未申俛仰成淪薄撫志懷苦辛

其二

旅食遊京華，厠彼多士末。負擔既云弛，徘徊建禮闈。寒暑易流謝，云何慰契闊。感物多思心，耿介眷明發。指途戒出宿，寤歎念將別。臨樂操土風，覽鏡悲素髮。旌蓋淹河曲，我日脩已月。載瞻浮雲征，永願巢林樾。

使中都道中作二首

將命適遠京，夙駕戒征侶。臨流別友生，野塗曠延佇。靖恭爾所敦，我志不遑處。揚旆越脩垌，舒節薄蘭渚。日夕

秋風生曾是歲不與淒淒聆候蟲肅肅望歸羽蘊結愁
我心沈憂誰能去悟彼詩人言歸來藝稷黍

其二

涉汶倦迴浮淮憎蕩潏通波引樵沛伏流濫桐栢遙
林結長烟平莽曠秋色朝游警侵星星駕馳落日獨倚
私自憐悲風起蕭瑟參知諒能蹈五善庶克獲

道中述懷作

肅事辭雲陞牽役遠徂征素秋改朱夏千里涼風生凝

霜被四野淒氣感人情民生實在勤誰能獲常寧翩翩
離鴻翔嘒嘒寒蟬鳴潐潐衝波駭疊疊愁雲興仕呂竊
所希長揖謝三迎三迎豈吾節且復事契闊夙駕驚遄
途撫志慚明哲時逝焉有停憂來不可輟心憂難克明
河廣易云越

楊青早發

解纜催晨發天高秋氣清度雲巖樹濕泣露渚花明岸
靜羣鷗下汀寒旅鴈征觀風徒有意辛苦遡洄情

淒其

淒其臨水意游子滯他鄉
絡緯悲吟切蒹葭秋思長
翳雲迷岫色澄月瀉波光
永夜勞歌起青天望鴈行

流河紀興

涼飈滌殘暑沿岸綠陰多
秋色生遠海浮雲空九河
蟬聲雜鳴籟影亂繁波我
懷方浩曠臨觴酬短歌

夜作

帆飛川路永烟霧杳空溟
蓼積寒江渚楓凋古驛亭
日

沈昏溜影雲起亂峯形入夜看牛斗安知有客星

入齊境二首

靈山表東海旭日指全齊巘出遙空峻林含宿霧低長
風送雲鴈疊浪下江鶻悵望何人悟迢迢旅思淒

其二

夕吹河津渡霜旌野岸浮林疑千樹積壤辨五星流黃
雲凝海氣白露肅關秋永歎張平子歸心有四愁

將至東昌

前瞻博平郡雲渚蕩清暉晨風一何鳴秋鴻稍欲微今
日他鄉酒思共故人揮獨有空林葉蕭蕭滿岸飛

沛中

飲冰從遠使飛帆入沛中客思憑南斗鄉心渺北鴻日
落長河靜雲散暮臺空帝業光千祀天歌仰大風

將命

將命戒征軒川途饒吹喧平生稀博望雅節在河源天
長秋氣靜波亂日華繁主恩良已渥思酬秘室言

滁陽道中

晨征凌絕磴，夙駕上危巒。
逸旆翔星末，驚鞞激霧端。
崇壤延江色，荒池積露寒。
長懷萬里志，寧知九折難。

滄州懷古

旅泊荒川上，凄然自遠風。
野寒消暮靄，堞影帶殘虹。
巖迴驚兔兔，天長叫斷鴻。
雲生滄海闊，月落九河空。
年代雄圖盡，吁嗟逝水同。
懷哉下帷子，秋草思無窮。

河興

紺雲開曉露畫角起重樓行擁皇華節言方青翰舟桂
輪迷落月竹箭警奔流地詒三門險天疑九曲浮飛霞
橫別島懸沫沸中洲樹斷巖容晦鴻來蒺色秋龍圖悲
逝水馬頰辨荒丘惝恍將何道長謠失旅愁

泗州道中三首

亂流趨泗上揚旆下淮潯岸出遙林險天浮大澤陰濤
聲驚枕席霜氣肅衣襟迴眺依星渚前瞻失霧岑雲迷
欲過鴈浪駭正翔禽誰令獨不化淒感暮遊心

其二

濟北月槎下淮南木葉秋長謠入泗水極目覽中州曉
吹迎霜咽寒旌捲霧浮草光凝雜組海氣望城樓一葦
愁鄉路膚雲渺帝丘客心無欲速桂樹可淹留

其三

客遊異風壤旅眺極川原碕岸奔濤急遙林宿霧繁魚
鱗辨雲色桐柏引流痕渚淨禽爭浴沙平鴈載軒望河
思啓瑞矚洛眷餘溫獨有四愁在長歌不復論

上海道中

東望頻依海南行不見山
清秋成小客落日照離顏
柳影平沙曳霞明細浪還
星槎去不返留語向人間

停橈

停橈漢帝鄉醉酒古亭傍
草樹銜豐密雲天引碣長
碑寒落馬字劒鬱斬蛇光
明發橋東路懷人意不忘

暮作

江蘋風欲微星樹動清輝
坐看陽鳥落遙憐去鷁飛
彭

山四面合淮水衆流歸此夜聞吳詠還應淚滿衣

五河道中遇蘇侍御

楚鄉羈客過秋分相伴帆檣鴈數羣更指鳳原催使節
傳呼驄馬駐斜曛風前厭聽淮南葉天外愁看洛北雲
明日獨攀叢桂去八公山下遠思君

真州曉行接唐太史書

獨遊京國歎離居不見情知幾月餘車馬駢駢行鞅掌
星霜冉冉去躊躇茂陵誰慰相如渴瓜步遙傳太史書

肯解欣然江渚意秋來同爾食鱸魚

真州溪泛

佳期渺何許宛在水中洲棹拂緗荷密船移綠樹幽晚
風清暑氣新月澹川流滿目江南意誰曾物役愁

過維揚作

念昔恭明祀三秋滯楚鄉茲言還上國五月渡維揚戀
土情何極瞻途意轉長川原歷滿迤烟樹引微茫浴渚
鳬爭下驚沙鵝忽翔江隅有芳草幽思獨難忘

濟寧道中作

脩景移南陸孤舟指汶陰予心厭氛雜何地覓蕭森微
尚竟多負荒塗茲復臨風烟稍異昔懷抱不堪今峯際
雲容改沙間日氣沈試看垂翼鳥應是未歸林

夕泛旅思

行行道轉遠于役定何求旅思依旌幟鄉心向驛樓霞
陰凝雜樹海氣逐驚流此夕勞歌罷惟應月伴愁

齊川

日暮齊川上乘風遡急瀾雲清炎盡却湖白夜宜看獨
往從吾好忘懷向處安前村未可泊新月在林端

湖隄晚步

步屨湖隄上行歌煙霧間從來物累遣彌覺道心閒待
月唯臨水看雲直到山沙鷗況可狎容與自忘還

湖興

客路浮清濟西風引汶川巖容搖浦岸水色淨湖煙旅
鴈青山外殘虹綠樹邊滄浪擢謳發待枕月華眠

旅泊感懷

長川歸鳥盡微月在城樓世網終年困羈心此夜愁友
朋常竊長歲序屢驚適何事蛩吟急他鄉已報秋

獨酌絕句

琴中足山水盃裏即雲霞是處東方逸飄飄莫問家


舟次潞河生朝述懷

誰言帝京邇阻此溯洄前習坎經流沫平生冀息肩良
晨果何在初服未能旋自悔雲蘿隔徒勞夢寐牽蹉跎

改容鬢來往異風煙末路嗟飄梗知音想絕絃行行窮
上國望望竟長川霞作重樓舉星為雙闕懸開尊對蘭
渚佇檝倚芝廬策馬復茲去羣龍竊愧焉邴原惟欲免
劉向不圖遷始願名山往終期微尚宣音微行有託歲
月坐空捐為語傷秋客今非騎省年

憶家

臘月冰河上帝州別予妻子忽驚秋天邊不見傳書使
落日歸鴉無限愁



皇甫少玄集卷十六

欽定四庫全書

集部

皇甫少玄集卷

十七至二十

詳校官監察御史_臣曹坦

中書_臣劉源溥覆勘

總校官進士_臣楊懋珩

校對官中書_臣黃秉元

謄錄監生_臣汪大梓

欽定四庫全書

皇甫少玄集卷十七

明 皇甫湜 撰

行役

歲己亥七月之郡發都作

俟罪承嘉惠鞠躬竄河內淹泊過蘭暑迎秋戒征轍側
感信宿期俄悼古今別方悅涼風生猶苦炎埃結蟬鳥
鳴山原雲霞被截稟伊予秉孤尚中路困緇涅將踰彭

咸居徒瞻子牟闕乘流暫清曠倚舟延川月且從曲士
誚未達古人節終乏符守才何以佐時哲

入舟

停策厭霖潦登轡美雲樹輕颺自遠集川色靄已暮澄
瀾含霞彩遙洲泛秋素頗協倦遊情殊深隱淪慕從來
困弱植拊志慚遠度時會苟難并持操不易固放斥金
河居眷戀玉門驚幽桂日夜零悵望江海路邈哉衰生
室忝此千載晤

溯舟暑熾河隄田林登憩

脩途阻鴻湊餘景睠河壖羈心苦鬱拂營魂茲浩蕩芒
焱焉可揮流沫詎易上未息區中緣徒結遐外想晚舟
凌石碕稍值雲林賞泉卉聊自適得已非外獎不恨身
日遼所願欣獨往將遂一舉心豈顧九韶養

夕泛遣思

開秋兆徂節汨吾旅川陽臨此秋氣悲旅魂滋洋洋何
況隔心賞徘徊眷河梁感別念有緒指途憂無方汀渚

屢迴復風濤增慨慷兩鄉日子跂一韋思誰杭微月掛
石壁萍草亂寒塘翳翳雲去岫塗塗露委芳淥水沿北
舫朱華嬉南檣聊自知魚樂江湖永相忘

夕景舒眺泠然賞寓

朝游涉長瀨落景憩雲汀洲渚杳雜沓風物共淒清霞
草望如繡極目千里平瀏瀏夕飈急悠悠沙月明乘流
任所適忘我羈旅情攬蒹測物序結蘭懷友生寄言山
中志歲暮期來并

夜入齊壤

客行安所期，偃舳宵更發。
日夜代我前，流坎廢工拙。
來觀有新故，故玩無髣髴。
竹樹餘鬱芊，潮瀾紛蕩汨。
瓊霞澹欲曙，玉衡斜未沒。
擊汰娛白雲，挹觴弄華月。
不見秋水端，長天迴溟渤。
適已萬化冥，即事兩情達。
何必凌三山，茲行信超忽。

遡衛

出國夏未半，入衛秋始闌。
長波逝不處，風露遍空山。
離

念久鬱陶于役時易遷汎柏懷今憂攬葛興曩篇無患
徵在昔多士國所甄遠希近關達近存如矢賢求心兩
惟谷慨往增泣然萬事豈云已幽志從此宣逃樊大河
渚避緣清漳淵覽輝異鳳擊戢景同鯢旋幸鑒逸生可
將為智者言

過陶山作

奔濤邁我日驚蓬頻異壤朝徂歎京周夕宿怨河廣近
涉倦迴薄遐眺極儻莽乘孤泛星闌挹流對秋爽鮮雲

隨風來殘霞延月上不寐懷古今眷物徒慨慷瞻淇非
尺咫歌瓠詎疇曩壁彩終寥闕龍文滋恍像榮光竟誰
覩逝川空復往何以宣我心促柱發幽響

新鄉作

尋役祇簡書夙駕命征僕凝澌澌涉軌長風吹改服臨
河暢悲襟登原散憂矚落葉紛衛情游雲蕩淇目停憶
滋所懷思音爾金玉哀響亂余帷寒膏照絃曲偃蹇東
方明不計腸斷續

汲郡旅情呈天水胡公

于役歲云暮驅車此復征
嵩雲渺鄉路衛水疊歸情
迴塞驚沙亂寒原落日平
那堪望旌節飛雪度梁城

之崑崙道中書懷

迫歲物務勞念此近郊客
趨塗無百里江城望來隔
三年謝旅遊登艫悵疇昔
既感道路艱復歎時序易
川葦夾岸鳴湍浪乘風逆
微微散林旭泛泛隨波翻
眷言濁尊酒誰遣他鄉夕
予方畏簡書春陽事行役

舟還使風

宵來苦湍浪晨喜逐風行獨此揚帆去遙隨飛鳥征望
雲疑岸駛出浦覺船輕却笑淹留客元知不共情

吳江舟夜二首

旅泛季冬時寒深百川匯隆條寂無禽晴蹊雪仍在獨
夜湖傍人遙汀霧兼靄望月測虛盈臨流意冥曖懷古
發棹謳扁舟寄幽慨

其二

邑壤帶豐津人家映迴汜徙泊眺長原數處征鴻起遠
心滄波外客愁鐘聲裏夜寒江舟靜孤月照煙水獨寤
方悠哉勞懷曷云已

京口曉發之真州作

前津渺征路濟此大江深且自揚帆去誰為遊子心天
遙滄海岸鄉近白雲岑慷慨長歌發臨風懷古今

彭城道中雨行

晚遡彭山道歸雲暗幾峰殘陽向湍沒飛雨度川重誰

遣長途思還傷逐客蹤已看淮岸盡鄉夢渺何從

沛上旅懷寄兄弟

向暮勞歌起川長緩去程鄉迷淮樹隔塞斷楚雲平浪
迹舟誰繫繁憂酒獨傾如何原上鳥偏近旅人情

早秋楊村旅次懷伯氏季氏

滿川風露急涼度海門初蘗葉先秋下江星永夜疎客
心憑北極鄉路憶南徐塞鴈何時至平原有素書

河西即事

涼颼千里動秋色遍川墟鳥影羈心外潮聲孤枕餘雲
沙朝戍合河漢夜帆虛一葦方能即皇州渺跂予

河館月夜

半月光疑溢懸知度瑣闌初宵耿河漢百里靜烟霏迴
訝青葱辨前瞻鵲微客愁當此夕猶得傍清輝

衛河雨後

帆逗河湄暮雨收隴雲飛盡見皇州楚鴻南下看形影
其奈心隨衛水流

夕泛

蘆葦霜寒河漢空
扁舟入夜泛微風
也知人世同為旅
且得乘流寄月中

客愁

塞門羈客向南遷
霜落滹河歲暮天
始欲愁時沙鴈起
熒熒孤月滿前川

汶上

悲秋秋復盡
汶上過帆稀
江水猶千里
征人獨不歸
霜

林看月冷風岸聽砧微若識名賢意無忘掩舊扉

薊北

薊北秋風落江東旅望哀故林黃菊遍張翰未歸來

秋暮旅病憶周子

名山獨往處知爾念離羣幽草秋仍合驚猿曉却聞還
家憐白髮策馬愧青雲何日虞溪上清風常對君

下邳晚行絕句

斜日歸鳥外寒流落木間片帆邳城雨滿目淮南山

鍾吾驛晚思

遙山白雲外古驛青林端惆悵川鳥盡蒼然多暮寒

淮陽

海畔淮陽郡風煙奈此何客心自容與湖上幾經過驛
岸丹楓少人家綠樹多雲帆朝見市津火夜聞歌城郭
連鴻鴈江山映綺羅寒潮正相待歸興滿滄波

宿下邳作

落日下長川餘霞散林樾戒徒斂舟檣水鳥煙際沒懷

古邈英風臨流浩歌發伊人信龍變看雲思超忽翻飛
竟何時傷哉旅華髮客心渺誰晤耿耿波上月

過彭城作

理棹返京城日夕邁廣川飛沫遡呂梁連巒越彭關襟
宮瞻崇嶺魂魄驚迅湍河清雲氣伏代往朝市遷懸於
測逝水利壘棲荒煙微生偶明世文化光八埏良圖興
淪感屈德眷昌言伊昔違旅遊三載念于旋炯憲懷華
省繇痛不及捐終制遵王塗灑泣辭故山聿來復徂暑

炎氛蔽長天行途彌沈隕連觴多鬱煩曷為繼我日中
情無由宣叢心隱天業英風悵頽年聊卒榆枋化臨流
奏歸篇

立秋前二日流河驛作

流河驛下未逢秋那堪墜葉似行舟宵窓乍見明波影
蘋末風來客倍愁燕南氣殊物候改歎我驅馳獨未休
他鄉歲月忽易度故山芳杜空悠悠

舟中簡子循時達天津

與子離家今幾辰畏途千里倦風塵男兒雖未免羈旅
人生豈得長苦辛帆檣更發西津曉望入滄洲秋氣早
炎雲忽共洪波盡客愁且對清尊倒眼前已少灞亭人
夢裏偏多潞河道

齊城九月悵望舍弟先發

海畔霜流夜色來
斷鴻聲入楚雲哀
看花更惜他鄉別
憶爾遙登戲馬臺

日暮經汶湖

涉世無良圖懷祿赴江潯靡靡即遙路風湍浩相尋首
夏戒予軫聿歸冒寒陰旅人感載離日暮多思心經途
臨汶墟澄景泛崇深棲霜潔晦渚層澳鮮陽林凌汜趨
南匯乘瀾睇西岑歸懷眷茲賞倚棹發微吟曾是苦維
繫愧彼波中禽

清口作

微旭散洪濤遙帆泝清口森漫連長鴻空澄映衰柳岸
白海氣交客寒楓霜厚易冬羣物晦心悲別家久思返

退耕初彌傷薄遊後愧昔不遠猷匪人獨貽咎枰櫟伊
可懷浮雲復何有

湖泛

我行踰孟冬風湍日云滯聿來沂淮甸還途指江裔暮
靄散長蕪遊目盡湖勢蒼茫寒葭外浩瀼白雲際棲鳥
去人煙驚鳬下漁樵行行忽超遠望望更前詣天色隱
鴻濛潮湍失空霽客念坐纏綿臨泛泊無繫適國情已
違歸田事仍戾永言期滄洲拂衣自茲逝

過石門雨後溪行

桑煙涼裊石門隄
林裏爭流百道溪
別思客愁何處著
青山宛在暮帆西

歸安旅情

逆舸凌風發
津途旅思催
夜天寒澤國
孤月迴江臺
客序楓林變
鄉心苔水迴
雖非折腰吏
昨已賦歸來

舟行望道場山

靈巘居然勝
祇從望裏看
洞雲疑客到
巖桂悵秋殘
漠

漠煙霞晚行行溪澗寒誰憑解含意孤月下清湍

期登道場山不果

悵望丹梯隱翠微溪林煙暝鳥歸飛來經蕙路秋將盡
坐對名山心自違

曉渡曹娥江

趨塗未云已霧雨行江干輕舠不可渡柳色誰能看望
流藐衣帶懷人悵風湍溪陰獨愁旅海嶠餘春寒

下姚江作

發夕迷海津乍見晨霞晰春日泛雲濤殊忘越鄉別惠
風紛入懷連巒翠堪擷念乏京抵謠慚紆使者轍

春暮即事在寧波作

攬轡歷徂春海氣獨蕭瑟蜃雨夕鳴風鮫煙晝含日懷
祿竟何成俛首時自失鞭撻仍惠心案牘更緬帙微尚
終不違勝事兼可迷目眺方峯雲夢度張平室

赴赤城述懷

曾是沈金馬迷津春水涯滄波無下鳥碧樹有驚花過

爾從機事紛吾戀歲華何由解纓絡愁思赤城霞

北渡憶子循弟

北渡到南渡但看風浪深桃花忽欲暮行子獨何心日
有疆中發時聞池上吟春遊良已善憶爾廢登臨

桑洲道中二首

仙岑已可到客路指桑洲雨帶朝霞色溪含滄海流尋
源期獨往登陸羨茲遊去住堪乘日春山無旅憂

其二

疊障無時斷春山盡日行遙疑徑路絕但見雲霞生迹
自忘機暇心猶履險平聊承古人意一酌澗泉清

桐巖曉發

厲澗越南岑拂霧趨東土宿處惟蒼煙遙天徑如縷林
光曙鳥散海氣寒雲聚憫勞感婦歎搖搖涉春雨

旅途雜詠四首

行歷千巖下碧湍客中風物帶愁看山陰道上飛花滿
不信春情亦自難

其二

二月樵風應晚來，剡溪如畫布帆開。
傍人訝有凌雲思，知我看花玉洞回。

其三

海畔春殘客，溪前夜半行。
西莊月未起，幽意待誰明。

其四

我別丹砂縣，行看碧嶠雲。
題書與劉宰，寄意在無紛。
臨海

令子興也

皇甫少玄集卷十七

欽定四庫全書

皇甫少玄集卷十八

明 皇甫湜 撰

寄憶

翠華歌奉寄白巖喬司馬

翠華遙在鍾山側
五雲松柏空愁色
長干街頭飛落花
秦淮樹上啼早鴉
鴈門旌旗塞江口
蛾眉哭聲徹南斗
翩翩漁獵百草長
紫鱗白額隨龍驤
赤心將軍射鵬手

馬上彎弓天子傍京塵北風暗麟玉梨園子弟爭馳逐
彭蠡中丞思赤松留都司馬哀黃竹御苑朝天楊柳垂
錦纜牙檣那得知寄書惆悵話王室一夜秋風鬢欲絲

雪山歌奉寄彭太保

雪山差我控西極寒井陰光混開闢千秋鳥道無陽春
北風慘澹吹峨岷羽書宵過褒斜道火入靈關徹昏曉
愁雲百里填城河帳中銀燭然盤陀將軍狐裘細馬馱
彈箏伐鼓金叵羅指麾羽扇白玉珂背河一戰收蓬婆

銘功刻石報天子麒麟閣上事已多憶昔中原全盛日
八方無虞醴泉出龍舉空悲劒舄藏海南漠北俱蕭瑟
君王垂衣念西土錢塘老子不足數彭公大梁佇獻捷
已見彤弓出天府持節心知主恩重入關更識王臣苦
文武吉甫非公誰臨洮健兒勇如虎驥子朝披玉壘雲
魚文夜濕金隄雨閭中一月見節制烹羊宰牛割清醕
狼籍衣冠頌破竹馬前父老稱安堵園陵佳氣春氛氲
錦官城中日歌舞當時匹馬更朝天又逐輕車過酒泉

勲名豈數七十戰至今邊卒高枕眠歸來謁帝承明殿
世事那知一朝變功成下吏古所悲浮雲蔽日今曾見
天下驚聞柏臺火匣內空留上方劒壯士長歌梁甫吟
孤臣獨泣瑤池宴蓮峰落月照黃河榆谷飛塵暗蘭縣
武穆祠西秀水流一望江山淚如霰

西湖歌寄方思道

西湖窈窕三十里柳絲含煙拂湖水青山蕩漾春風來
蘇公隄邊花正開玉缸春酒映江碧幾醉江花柳花白

城頭日出照高樓銀箏翠管喧行舟吳姝如花捲綃幕
山水倒入金屏流朝來復脫千金駿還有牀頭紫綺裘
人生行樂莫顧惜落日松風吹古丘我憶京華舊遊地
漁浦東看動愁思醉裏空歌鏡湖月夢中尚識孤山寺
信安使君還舊溪應對花卮惜解攜白沙翠竹無人問
湖上孤吟聞馬嘶

山中扈從寄懷子木

肅事從宸豫同聲景上才臨花燕蹕靜入竹楚帆開賦

類投湘作查疑上漢迴曉芬流蕙砌春思引霞杯寓矚
珠擔麗凝情石溜哀還聞梁苑客芳駕並鄒枚

懷寄諸兄弟三首

萬里南飛鴈何時塞上來客愁懸落日鄉夢繞胥臺投
筆情還在垂竿老未催淹留此懷舊長使壯心哀

其二

悵望皇畿宰彈琴政擬誇飄零金馬客回首事堪嗟落
日邨城遠春風滄水賒相思浩歌處草色遍天涯

其三

不見白眉弟慨然心莫陳風煙一以眺流落倍傷神塞
嶺雲還寂江臺月共新行看斗牛氣離合定何辰

夢友人王惟楨作三月一日也

蘭友阻言覲幽歎彌歲時及我淹河渚雲龍爾忽辭懷
玉悲棄捐撫劍惜乖離山川渺千里載覲春華滋滄洲
夢夙昔賴此慰相思憂歡故相雜飛魂不自持攬衣託
毫素緘淚達江湄

晚景孤坐輒懷王子

蟬鳴夕思多荷藻清陰聚餘霞斂遙岑疎星浮近浦明
月來何遲佳期過三五方矜會面歡俄軫離居苦望望
遡征雲曷由附飛羽

寄金氏

白日下庭陰寒氣淒以肅凝雲翳廣野昏飈塞陵谷旋
顧異形音傷彼無枝木哀鴻失其羣鳴飛一何速徘徊
興憂惻離念增煩促秉心亮伊人為猷鮮不淑翹思不

可即崇都交甸服征軺無日夜爾音胡金玉嗟予傷夙
昔時哉志彌觸玄情憂未逮麗此推舟陸我有松檜櫂
何由泛江澳乃心東南流默默以自卜倘因春水泮終
然騁高躅

寄友人

遊子辭京秋已深扁舟遙向五湖陰寄聲不用南飛鴈
明月迢迢傳我心

有懷子木惟楨

王生倦省務傾想宛溪涯蔡子來自南返役荆湘槎開
徑延良覲汎瑟慰幽遐披帙遲有瑩撫景曠無嘉流風
結庭芳數雲湛園華彼美悵佇立高窓銷夕霞

子木書至

蟲鳴陽景戢潦收秋氣滋涼月懸高軒清氣盪華池我
友勤遠役迢迢湘川湄遺我篋中素款情勞所思幽蘭
不可結洲寒落芳蕤征衣夕掩露江臯風正悲寄言於
浮雲為子東南馳

憶友作

園霏散煙華日氛曠山霽崇霞開夕襟澄川延晚睇幽
懷倦羈客塵蹤苦留滯佳人閤琴酒為樂思及歲道景
忽若馳回風切搖蕙

寄山中友人

遺世世有經濟物物有宜玄軌不存我龍變安可期矯
分赴淵流削迹性所違曰予暗師訓微尚在巖棲適來
謬觀國時義邁升階文采豈獨異玄素中自睽撫情軫

昔痛離慙申今悲淵魚駭雲秦山猿驟文衣負心愧初
服省已慙良知逝舟鴻河域流想蒼岑扉雖抱逝矣感
猶冀來者追榛塗疚東失榆景眷西思幽山桂未歇霞
月餘素暉慕類心悠悠傷歸歎栖栖諒篤終始義庶鑒
明達懷

秋夕有懷

孤游傷蓬轉思端乘夜作寒膏澹無輝淒瀝叩哀壑吟
蛩依戶響舞葉交窓落無衣詠卒歲休車謠好樂美人

隔雲端金罍誰共酌欲知我心憂懸旌無終薄

寄懷王道思三首

吾賢國之楨海內英流眄揚嫗乃見詠懷璧本滋患昔
慙聽履同今嗤掛冠晏他日良史書庶無題巧宦

其二

鄭生返蓬室陶子颺輕舟睠彼千里塗擊汰邁吳洲星
遄不遑舍晤言獨無由邈然山川異佇立增離憂

其三

悵望閩陽山
蒼蒼白雲裏
行邁爾娛憂
放歌從此始
登郊俯胥水
水流何瀾瀾
相思倘有源
逝言無窮已

懷申生

昔我承嘉惠
竄跡大河潯
洪流逝滔滔
遊子憂思深
回風飄虛閣
索處悲難任
申生蘊璵璠
投分義所欽
綠綺久不奏
為子激哀音
眷眷感離志
冉冉遂迄今
晤言恍如昨
一別歲載陰
微我憂思勞
非爾誰為心

寄蔡子木

帝暉騰婺耀澤采蘊驪珍雅徵惟降理世載炳靈人聯
翩登玉府伊爾歲星臣終軍年獨少金馬跡方淪河源
永有慕輶軒旦還驚言膏齊魯車復指湘沅路日觀曬
秦封雲臺題楚賦佇情溫室殷飛魂索居屢驂服遙駕
行比翼共翱翔咸賓五明側餘照百華傍兩闡承紫極
脩漢邇清揚鳴珂蹕宿影覆錦爛霞張露清湛玉掌水
綠泮金塘含情聊寄軫攜手亟飛觴茂先稱博物公幹
擅雕章蘭蓀言自馥蒲柳歎恒忘信美風雲契更幸休

明世龍旆識天行鸞文瞻日麗河東忝扈從周南不留
滯遺儀諒爾諳嘉頌豈予第密霰灑寒原送子戒行軒
炎埃蔽河澳相將命征軸羈旅切離愁于役逝悠悠心
傷貝錦折淚逐鴈書流懸旌眷城闕駛棹別江樓疲戟
乃多舛懷沙祇自尤緝眉困塵莽鞅掌濶衾幬疾首三
陟痛銷志百罹憂昔慚杞梓用今悲搖落秋天涯凜秋
色客子故鄉憶衛渚發孤帆星闌不遑息張翰久思歸
陶生昨已非剪棘開樵徑采荷製山衣草蟲鳴夜旦同

懷隔言粲故疑惟爾析新藻復誰玩結芳徒思勞顏齡
積幽歎遙傳過江札知矯入閩翰溪流烟華淨亭峰雲
影亂披煙躡椒庭拂雲扣芝觀康樂詩應侈尚平遊豈
晏且抑長往志毋貽徽音惋翹足企江潯延頸冀徽音
月隨桂岑遠霜流楓岸深理絃不成曲覽鏡難為心無
由假鵠羽千里一相尋

再得元達至東昌書感寄三首

念別秋雲動懷君心莫陳片帆聞昨到尺素喜來頻望

阻齊城路愁飛燕塞塵忍經得失異淒颯欲沾巾

其二

感憶征轅邁嘗銷去住魂交情誰得似古道爾能存雲
靜禪房榻花深省署尊遙知各回首何日更同論

其三

落日黃河渡悲君戀母情驅馳應不惜留滯獨何成雲
苦荆丘沒天寒潔水清政才看逸發五馬讓賢名

泊潞河奉寄相國介翁二首

來玉亭前候履音當年曾亦濫華簪
扈從快覩風雲久獻納瞻依日月深
每愧鉛刀輕一割虛令駑馬重千金
羣僚動色揮毫敏獨訝知公翼翼心

其二

夙夜貞勤南省賢文章勲業果誰先
近參端揆忠逾契獨奉絲綸意每宣
禁漏須臾雙闕地清揚迢遞五雲天
廿年潦倒龍門客此日飄蓬倍黯然

問訊子循臥病二首

養疾春山裏松齋永晝虛焚香讀道論閉戶檢方書鶴
舞庭偏寂花飛徑不除非緣高卧久那使俗塵祛

其二

水竹為君癖煙霞非世情避人春草暗行藥晚風輕幌
月虛時矚窓泉靜後聲冥心終不化為謝魯儒生

懷吳客部以容

故人吳季子起草仙臺端蘭省碧雲外瓊枝何日看江
銜遠空盡月帶疎煙寒芳歲一為別夢來秋草殘

寄遠

情親渺千里悵憶長河湄盡日無由慰青春有所思空
看江上鴈難寄隴頭枝夢罷正愁絕寒窓月到時

春臺寓目招李子釋大

春氣靄中林愁思不可任故人同省闥何事間招尋惠
采時流砌清香亂入襟城光三月暮閣道五雲陰跂石
情聊遣看花意獨深游魚爭避影幽鳥自鳴心且欲江
湖去因君寄一吟

奉懷李少卿

嶺南旌節下江城歸到依然谷口耕
今日閒居憂社稷當年啓事動公卿
青雲畫省從來意白雪朱華老去情
惆悵春風樹桃李蹉跎秋色竟無成

早春寄台州佐王惟楨

故人長沙謫量移投越鄉幸對台嶺秀
日令歸思忘霞色照高卧白雲盈
訟堂苔陰接空暗瀑翠侵階涼五月
蜩始鳴與君別河梁昨來倉庚飛
春風滿吳閭感茲流

運駛坐為羈宦傷伊余厭塵世魑魅甘巖廊顏空紫榮
落夢引滄波長曾城定可到虬駕何時翔

寄華陽兄

抱玉吾兄恨征轅不可留曉樽衣重攬春甸淚俱流遙
憶看花處誰同採艾遊停舟多宴笑難達薊門憂

六月四日秦兒之生朝也雨酌懷述二首

念汝懸弧日于今一紀臨雨杯聊土俗晨鏡豈吾心勞
愛情能已經年恨自深如何懽置膝玉樹倚秋襟

其二

舟樹曾迷望泉雲尚黯魂別堪維岸久淚憶把衣繁消
息虛傳鵲肝腸易惋猿心期一峯足鍾鼎未須言

寄弟

秋宵思不盡離袂忽經年夢合風雲後書歸鴻鴈前數
奇非爾事節若竟誰憐錦莖芳菲處羞將別句傳

不寐重憶林子

徐倚巖城月前瞻祇樹林寒尊餘晚興風徑自清陰莫

下楊朱泣終知賈誼心宵闌不憶汝誰遣客愁深

皇朝少玄集卷十八

欽定四庫全書

皇甫少玄集卷十九

明 皇甫湜 撰

寄憶

憶山中漫賦

讀書二十載寤寐攀羣龍謁帝三千言意若凌煙虹北
魚化為鳥臨飛闕天風君王膝不前低眉愧英雄彈冠
偶時流居然付西壙得失豈足道吾身本秋蓬往事一

回首含情自無窮但恐巖上月窺窓笑帷空公卿舉伯
樂鹽車終未逢愆期復無時何心照光容寂寞揚子雲
著書羨冥鴻雖歌紫芝曲思留四皓功落日憶故山商
飈感人衷會當高蹈去散髮滄溟東

寄張叟

君心琴德合自然抱琴雲卧三十年殫思止息意入微
豈解古調今獨傳昔時投契人莫比今來拘迫風塵裏
几上素琴月彩凝空有徽音不應指猿鶴冥冥動我神

預愁莫辨桃花津夫子已成東海隱笑殺王良稱故人

寄周以言

周子相逢十餘載自從相逢心不改今我一官幸際遇
惜君二毛只湖海憶昨共醉清溪灣矜雲傲月開心顏
不知世上有何事何況爾我形骸間向來細故誰足道
丈夫豈貴一時好恐君棄我忽若遺使我沈憂未能掃

憶兄弟二首

旅念因時發分攜易隔年棲遲終自惜衰薄已堪憐落

日懸歸思驚風迕病眠多傷下帷者索處過花天

其二

南國同林秀三荆古未如飄零有今日蕭颯倍伊予夢
憶滄江遠名慚畫省虛所欣頻驛使不滯士衡書

呂汝德病中懷柬

抱病君今晝掩扉琴書藥物暫相依常眠且就逢迎暇
習靜翻憐問訊稀閱世久曾嗤阮屐關心誰共憶萊衣
西曹獨坐成愁思厭對高槐有落暉

宜俯別未久遽以書至

遠別京華七月中
憐君憂喜一年同
每思人事悲難已
忍啓緘書讀未終
去國衣裳那復素
過湖舟楫杳如空
懸知不惜遙傳札
震澤春來盡北鴻

憶薇軒

城角迴殘月
天寒沙塞風
鄉心元逆鯉
雲序故多鴻
感欲朱絃絕
愁看青史同
薇花宵入夢
猿鶴北山空

遲栗子

幽居念爾才梁苑重鄒枚昨感風波別能忘雞黍來他鄉衰柳遍斜日斷鴻哀徙倚雲時度愁心獨未開

寄子循弟

題書曲梁宰歎憶滄河流問訊西來使羈離薄宦憂清霜空大漠寒日放中州可信悲心合雲霄不異秋

聞家兄將之金陵

聞君理孤棹欲向金陵遊却憶追懼日翻成羈旅愁鐘流客館夜砧響帝城秋得似滄江鴈東飛白鷺洲

子約弟夢予共話薇軒

紫薇花發處爾夢共予看
大被人何在繁枝春不懽
江山動秋早宮殿落霞寒
永夜那能寐疎星照倚闌

訊憶包子

鐘聲遙夕動孤坐念情親
伏枕禪心寂思家客夢頻
迴風時入戶寒月更依人
好擬酬詩句杯前雲物新

寄答家叔

高秋萬里月何處竹林人
惜此瑤音好今來隱興新
山

形藏綺閣海色照烏巾應為蒼生起徒知不免身

春日山居報友人作

弱齡寡深識進退昧諸已謬以虛薄姿驟駕陪多士隆
簡東朝英脫迹南宮裏聿來在梁刺自貽負乘恥褫服
竄河陰鼓枻旋鄉里息景謝時人清音惠君子偃蹇胡
獨然沈冥竟何以聞義祛吝惑鞠躬告終始曰余謝智
效方觀丘壑美考卜西山垂川陽靄枌梓田畝事躬耕
餘力從琴史老至吾不知可謂云爾矣介獨閣天徑道

勝無物滓幡然白雲心思為蒼生起乃茲小已懷幸承
大人理

舟中寄懷黃生志淳

淒然遠天暮獨坐憶君時溪寂雲歸早汀寒鴈度遲長
懷買山意况負入林期波上松門月迢迢寄一思

淮南道中有懷姜岳二山人

迢遞淮南路蕭蕭落木悲無端懷二隱忽共老明時獄
已卧遊徧人猶羽化遲楚雲看不極日暮獨何之

聞蔡子南曹之命寄懷

兩京道伊邇相望雲龍輝移迹且朝彥何年離省闈
海靈氣騰湊江樹日芳菲擊汰此長往寸心寧復違

過寶林寺不遇沈生

招提在人境行處隱情滋雲木清溪上春寒芳草時
鐘聲空水月天影寂階墀鳴鳥滄波隔從之勞所思

覽黃生談氏園詩因懷勉之

寂絕桃源賞新詩小庾誇春風三徑曲載酒獨看花興

引臨池竹情搖向晚霞尊前異今古重以惜瑤華

徐子九過予草堂語次及其先君言感往昔興

慨斯今懷述二首

緬欽吳國彥敷藻漢庭芬遺草依然在清風不可羣九
原人豈作華表鶴空聞未得攀嵇夜徒稱識子雲

其二

徐子今何在懷賢意轉悠更投湘水賦長想赤松遊思
繞金門月心悲蕙草秋惟應千載下名與漢江流

春夜對雨琴興憶張叟

何頃風流盡離羣思每盈瑤琴閒自御山水意誰明芳
樹雲帆影連江夜雨聲滄波迴難即徒有遡洄情

石憲副豫章惠音有懷

衛濱太守青春姿我放金門逢爾時瓊枝不異見顏色
瑤草何煩遺所思廬嶽遙瞻銀漢上鑪峯空與碧雲期
歸來獨卧滄江晚一念離羣鬢欲絲

過顧給事暮歸有懷

紉蒞白日暮，悵予蘭畹情。相逢澤畔客，還使壯心傾。
伊昔犯顏意，知非邀世名。片言霖雨沃，九死羽毛輕。
旅跡風霜寄，荒途沙塞征。南歸疑夢寐，西笑愧平生。
惋彼貴交署，欣茲雲卧成。胥江向人月，愁絕更誰明。

虎邱懷舊郡公胡中丞

勝地名賢會，風流在此山。時乘紫霞賞，高詠翠微間。
合舫煙霄下，褰帷士女攀。懷哉羊叔子，一往竟無還。

同子循初秋雨後懷虎山橋

同君別山寺心每懷滄洲山館對新霽煙虹開遠流空
歌碧雲暮悵望石梁遊况復西津月蕭蕭此夜秋

河陽馬上看江寄謝司直二首

河陽山頭江勢迴蕩雲沃日何雄哉天外長風吹未已
還須望盡海門來

其二

秋空立馬大江隄天畔雲山望欲迷何事愁心學潮水
朝朝暮暮秣陵西

懷以言

冬序條已闌如何故人隔浮雲寄幽蹤滄波任所適攬
衣默無緒迢遞東城陌朝來煙雨靜江帶寒山碧憶君
方寸間令予愧平昔

貽白鶴觀主陳師

屏騎向松路窅然塵境分窓中駐白日簷外觀浮雲心
遠泉石秀言同荃蕙芬遺蹤自可即宛已去人羣

駕言徂京寒夜獨坐感舊奉懷茂名李太僕

夫子秉清鑒謬予霄漢翻因思振奇策常得奉明恩
事一朝異歸愁難具論未能忘魏闕曾是滯湘源炎海
居遼落寒燈坐鬱煩知音華省舊歎息幾人存屢阻南
中信將尋北上轅誰堪復懷祿遙憶李膺門

歲暮憶惟楨

吳天朝罷雪晴望憶君時况復長沙恨悠悠江水湄青
山郡齋卧終歲石梁期已入樛溪路雲霞滿目悲

早春寄京臺友人

吳閭獻歲春已濃煙郊極望含丰容東風綠波泛城汜
畫橈直入西山裏晴山黛色欲醉人雲

闕

吾身酣來謔浪金門侶

我姑無心邁蘭渚

友人徐君自包山來訪予滯省役不晤

鞅掌苦羈宦離羣心以悲眷茲故人訪感激平生時投
袂未及展驅車何所之城南鴈飛盡湖上雲歸遲緘恨
寄幽蒞金庭空爾期

赴湖州兩湖蕭方伯先發舟行不及寄懷

所期渺何許，悵望此孤征。
畢景揚橈去，空江聞鴈聲。
村華逢獨挹，雲翼曠誰并。
坐永他鄉夕，思君一水盈。

苔上憶家兄

異縣窮秋候，寒汀朔吹繁。
羈離祇自惜，趨謁豈堪論。
縈水通羣澳，連山到故園。
寧知吟會客，愁滿鵲鴝原。

客湖州有懷施蔡二君

嗟爾聯曹湖水傍，十年何事尚為郎。
草玄亭掩秋雲靜，

訪客溪行暮靄長歸遲不愁迷草色故人空念寒蘭芳
相思莒上惟歌枕鳴鶴蕭蕭午夜霜

簡吳惟新少參

東都倦遊客湖上息陰初一徑煙波滿雙峰雲水疎到
門多好事作賦是閒居予有逃樊意從君問所如

寄孔學憲同年

風波行已倦日月方向除如何淹客舍復此歎離居送
爾揚帆下江閣錢塘驛邊暮潮落不見黃花映酒尊徒

對青山滿城郭雲天何處望行旌萬壑千巖度赤城幾
向飛霞摘賦藻祇憑流水寄琴聲霜猿寂寂人初到蘿
月悠悠思轉生不愁天路莓苔限願接浮丘羽翼成

懷包山故人陸宜俯

吾友慕真隱考槃鄰洞天白雲一帳望瑤草竟誰傳惜
矣林中諾懷哉湖上篇勞歌不成寐星霧滿寒川

節日子循別後書懷寄子約

獨坐憐時序寒城夕景催帝京書不到澤國鴈空來未

假扶搖便頻傷羽翼摧花前分棣萼天外望星台半載
虛朝籍浮生付酒杯物情應可識江上艷陽開

期周以言至日過山樓不果

側想伊人室清風西澗陰
考槃迷歲月抗館出雲岑
招隱詩空就忘機理自深
寒鴉依暮色明月照遐心
勝事那能悉同聲竊所欽
一陽回令節孤棹曠幽尋
竹下思名飲樓中遲賞音
樊籠徒有慕鴻鵠在高林

近台郡有懷王戶部惟楨

度嶺山仍合窮源澗復迴始知人境外自訝使車來春
日情能易江天別更催飛鳬何處覓鳴鶴向人哀

卒事黃巖將尋鴈嶺館夜不寐書懷寄蔡秋官

子木

揚憶周巖壤停壯眷霞泉昨余遠京邑迨茲歲已遷雖
寡季氏諾丹書庶無愆徒乏汲孺節惠風何由宣幽籟
虛高館疎星粲遙天靜夜紛懷昔達曙不成眠嘗忝春
華姿謬陪東序賢衆謠竟誰明孤貞坐自捐辱殆今始

知三載更風煙年志悉已非萬事促歸田寢務趨靈嶠
旋役謝塵緣披薜追名逸乘雲晤羽仙畢世保冥徽知
音鑒徃篇

發郡城之天台道中述所經覽寄孔謝二憲副
趙何二僉憲同年二首

委羽周遐討飛流更幽悰林蘿踐已深巖巒去彌重綠
雲迴崇溪紫煙蔚奇峯霞摛金潭藻雨濯春山容但聞
松泉音惟見鸞鶴蹤當同羽化客海上期遊從

其二

夕夢曾城阿曉行
滄波上縈溪復含流
連岑時隱障風
湍信千轉雲峰非一狀
錦繡紛迎翫氤氲忽彌望
蘭泉芬可掬苔壁險難傍
思偕同懷子攜手追禽尚

觀石梁夜宿萬年寺述遊寄伯氏子循子約二

弟周山人

微生不偶世孤拙
恒自將徒欽楚老喻
載履越人鄉五辭念乖恒
一往形瘵傷春山填委暇
乘日事游翔夕棲

鸞霞陰旦發桐柏陽旣弄石潭月復掇瓊臺芳雙闕轉
天徑萬嶺鬱蒼蒼鳳侶時髣髴花苔深紫房徘徊送落
日上下窺飛梁緬懷同襟懿暮色含悲涼絕冥良已遂
心賞何由忘愁思雲闕客聞猿清夜長

再懷虛岩子

異縣曾為客同君興緒開吳天遙罷雪臘月况逢梅屢
閱青春在相看白髮催天涯思會面愁極不勝杯

皇甫少玄集卷十九

鸞霞陰旦發桐柏陽旣弄石潭月復掇瓊臺芳雙闕轉
天徑萬嶺鬱蒼蒼鳳侶時髣髴花苔深紫房徘徊送落
日上下窺飛梁緬懷同襟懿暮色含悲涼絕冥良已遂
心賞何由忘愁思雲闕客聞猿清夜長

再懷虛岩子

異縣曾為客同君興緒開吳天遙罷雪臘月况逢梅屢
閱青春在相看白髮催天涯思會面愁極不勝杯

皇甫少玄集卷十九